

БАЁННИНГ КЎЧИРМА НУСХАСИ

Давлат харидлари соҳасидаги шикоятларни кўриб чиқиш бўйича комиссия йиғилишининг 6-СОН БАЁНИ

Тошкент шаҳри

2023 йил “26” апрель

Раислик қилди: Иқтисодиёт ва молия вазири ўринбосари –
комиссия раиси - Г. Рахимова

Қатнашдилар: Давлат харидлари соҳасидаги
шикоятларни кўриб чиқиш бўйича комиссия
аъзолари

Таклиф этилганлар: “Капитал Қурилиш Дизайн Сервис” МЧЖ
вакили, “Imron nur stroy-XXI” МЧЖ вакили,
“Kolorpak” МЧЖ вакиллари, “Azboa-uz” МЧЖ
вакили

Давлат харидлари соҳасидаги шикоятларни кўриб чиқиш бўйича комиссия
йиғилишининг кворуми – 83 %.

КУН ТАРТИБИ

1. Давлат харидлари соҳасидаги шикоятларни кўриб чиқиш бўйича
комиссияга (кейинги ўринларда-Комиссия) келиб тушган “Капитал Қурилиш
Дизайн Сервис” МЧЖнинг 2023 йил 4 апрелдаги 08 сонли мурожаати.

2. Комиссияга келиб тушган “Imron nur stroy-XXI” МЧЖнинг 2023 йил
11 апрелдаги 2/23 сонли мурожаати.

3. Комиссияга келиб тушган “Kolorpak” МЧЖнинг 2023 йил 8 апрелдаги
64-сонли мурожаати.

4. Комиссияга “Azboa-uz” МЧЖнинг *pt.gov.uz* орқали келиб тушган 2023 йил
1 мартдаги 28806-s/23 сонли мурожаатининг навбатдаги муҳокамаси.

5. Комиссияга келиб тушган “Epiroc mining and construction technique”
МЧЖнинг 2023 йил 17 февралдаги рақамсиз мурожаатининг навбатдаги
муҳокамаси.

Кун тартибидаги 1-масала юзасидан.

Комиссия аъзоларига кун тартибидаги 1-масала юзасидан ахборот берилди.
Хусусан “Капитал Қурилиш Дизайн Сервис” МЧЖнинг 2021 йилда раҳбари бўлган

Исаметдинов Хусанга нисбатан очилган жиной иш сабабли, Наманган вилояти Чуст тумани судининг ҳукми, Ўзбекистон Республикаси Бош прокуратурасининг Иқтисодий жиноятларга қарши курашиш департаментининг 2022 йил 13 сентябрдаги хати ва Давлат харидлари соҳасидаги шикоятларни кўриб чиқиш бўйича комиссиянинг 2022 йил 26 сентябрдаги 7-сонли баёнининг 3-масаласи юзасидан қабул қилинган қарорига асосан “Капитал Қурилиш Дизайн Сервис” МЧЖ инсофсиз ижрочиларнинг ягона реестрига киритилганлиги маълум қилинди.

Шундан сўнг Комиссия аъзолари томонидан “Капитал Қурилиш Дизайн Сервис” МЧЖга Жобир Акиловнинг фикрлари тингланди.

Ҳозирги кунда “Капитал Қурилиш Дизайн Сервис” МЧЖга Жобир Акилов раҳбарлик қилиб келаётганини;

унинг раҳбарлигида “Капитал Қурилиш Дизайн Сервис” МЧЖ структураси ва ишларни бажариш принциплари тубдан ўзгартирилиб, бажариладиган ишлар сифатига алоҳида штат белгиланган ҳолда иш олиб борилаётганини;

провард натижада “Капитал Қурилиш Дизайн Сервис” МЧЖ фаолияти яхшиланганлигини;

Жиноят ишлари бўйича Наманган шаҳар Судининг 2023 йил 23 мартдаги Комиссияга юборилган 1-202-2023 сонли хатига асосан “Капитал Қурилиш Дизайн Сервис” МЧЖни инсофсиз ижрочиларнинг ягона реестридан чиқариб берилиши сўралганлигини баён этди.

Комиссия аъзолари томонидан ушбу шикоят ўрганиб чиқилганда, “Капитал Қурилиш Дизайн Сервис” МЧЖни инсофсиз ижрочиларнинг ягона реестридан чиқарилиши учун Жиноят ишлари бўйича Наманган шаҳар Суди томонидан юборилган хати асос ҳисобланмаслиги, шунингдек, Ўзбекистон Республикасининг “Давлат харидлари тўғрисида”ги Қонунининг 78-моддасига мувофиқ давлат харидлари ижрочиси Давлат харидлари соҳасидаги шикоятларни кўриб чиқиш бўйича комиссиянинг қарори устидан суд тартибида шикоят қилиши мумкинлиги маълум қилинди.

Кун тартибидаги 2-масала юзасидан.

Комиссия аъзоларига “Imron nur stroy-XXI” МЧЖнинг мурожаатида кўтарилган масалалар юзасидан ахборот берилди.

Хусусан, Тошкент туманлараро маъмурий судининг 2023 йил 5 апрелдаги 5-1001-2307/766 сонли (давогарнинг давосини қаноатлантириш бўйича) чиқарган ҳал қилув қарорида: Аризачи “Imron nur stroy-XXI” МЧЖ жавобгар Ўзбекистон Республикаси Иқтисодиёт ва молия вазирлигининг Молия вазирлиги томонидан тузилган давлат харидлари соҳасидаги шикоятларини кўриб чиқиш бўйича комиссияси йиғилишининг 2022 йил 26 сентябрдаги 7-сонли баёни “Инсофсиз ижрочиларининг ягона реестрига киритиш” тўғрисидаги қарорининг 4-бандининг “Andijon ihlos qurilish” МЧЖга тегишли қисмини ҳақиқий эмас деб топиш тўғрисидаги қарорини Комиссия аъзоларига ўқиб эшиттирди.

Шундан сўнг “Imron nur stroy-XXI” МЧЖ вакили сўзга чиқиб бугунги кунга келиб корхонанинг инсофсиз ижрочиларнинг ягона реестрига киритилишига сабаб бўлган омиллар тўлиқ бартараф этилганини, масъуляти чекланган жамият томонидан бундан буён харид қилиш тартиб-таомилларида амалдаги қонун ҳужжатлари талабларига риоя этган ҳолда иштирок этишини ҳамда мажбуриятларни тўлиқ бажарилиши таъминланишини ҳамда бундай ҳолатларга бошқа йўл қўймаслигини маълум қилган ҳолда “Imron nur stroy-XXI” МЧЖни давлат харидлари электрон тизимидаги инсофсиз ижрочиларнинг ягона реестридан чиқариб беришни сўради.

Йиғилиш давомида Комиссия аъзолари томонидан мазкур ҳолат батафсил ўрганиб чиқилди.

Кун тартибидаги 3-масала юзасидан.

Комиссия аъзоларига “Kolorpak” МЧЖнинг мурожаатида кўтарилган масалалар ўқиб эшиттирилди.

Унга кўра:

Халқ таълим вазирлиги ҳузуридаги “Таъминот ва логистика хизмати” ДУК томонидан (239639 рақами орқали) “2023-2024 ўқув йили учун мўлжалланган мактаб дафтарлари сотиб олиш” юзасидан эълон қилинган давлат харидида “Kolorpak” МЧЖ ҳам ўз таклифларини берганлигини;

ушбу тендер савдолари бўйича 2023 йил 6 апрелда тузилган далолатномада кўрсатилишича “Kolorpak” МЧЖ бир нечта кўрсаткичлар бўйича белгиланганидан кам балл тўплаганлигини;

ушбу тендерда иштирок этиш вақтида, мурожаат муаллифи бошқа иштирокчиларга нисбатан ишлаб чиқарилаётган маҳсулотлар бўйича жозибадор ва сифатли маҳсулот етказиб бериш юзасидан таклифларини берган бўлсада, *(наrx таклифи “Kolorpak” МЧЖ - 7 682 976 000 сум, “Odil paper” МЧЖ томонидан - 9 436 860 000 сўм)* асоссиз равишда тендерда иштирок этиши чекланганлиги ва бошқа важлар маълум қилинди.

Ўзбекистон Республикасининг “Давлат харидлари тўғрисида”ги Қонунининг 79-моддасида Комиссия шикоятни давлат буюртмачиси ва иштирокчининг иштирокида кўриб чиқиши белгиланганлиги маълум қилинди.

Мазкур йиғилишда Халқ таълим вазирлиги ҳузуридаги “Таъминот ва логистика хизмати” ДУК вакиллари шикоятни Комиссиянинг навбатдаги йиғилишида кўриб чиқишни сўраб мурожаат этганлигини Комиссия аъзоларига билдирилди.

Кун тартибидаги 4-масала юзасидан.

Комиссия аъзоларига муқаддам мазкур масала кўриб чиқилганлиги юзасидан ахборот берилди ҳамда Ўзбекистон Республикаси Рақобатни ривожлантириш ва истемолчилар ҳуқуқларини химоя қилиш қўмитасининг хулосаси тақдим қилинди.

Рақобатни ривожлантириш ва истемолчилар ҳуқуқларини химоя қилиш қўмитаси (кейинги ўринларда -Қўмита) томонидан мазкур масала батафсил ўрганиб

чиқилган ҳамда Қўмитанинг 2023 йил 17 апрелдаги 1889/12-17-сон хати Комиссияга тақдим этилган.

Мазкур танловнинг йиғилиш баёнининг техник қисми ўрганилганда қуйидагилар маълум бўлган:

1. Буюртмачи Тошкент вилояти болалар кутубхонаси томонидан **1278** турдаги танловга қўйилган рўйхат бўйича **жами 16329** дона китобни **5 кун** муддатда етказиб бериш, ташкилотнинг айланма маблағлари, ҳамда танлов ўтказилиш вақтида ҳисоб рақамида **танлов суммасининг камида 50% га тенг миқдорда пул маблағлари** борлиги ҳақида хизмат кўрсатувчи банк маълумотномаси тақдим этиш талаблари қўйилган. Буюртмачи томонидан ушбу талабларнинг белгиланиши рақобатни чеклашга олиб келадиган ёки олиб келиши мумкин бўлган ҳаракат ҳисобланиши;

2. Буюртмачи томонидан **танлов йўналиши бўйича** охири 3 календар йилида тузилган шартномалар бўйича нусха тақдим этиш талаби қўйилган бўлиб, танлаш ҳужжатларида ушбу мезоннинг нисбий қиймати, баҳолаш тартиб-таомиллари доирасида баҳолаш мезонларини қўллаш тартиби белгиланмаган. Бу билан буюртмачи савдолар ўтказишнинг қонун ҳужжатларида белгиланган тартибини бузиш орқали рақобатни чеклашга олиб келиши мумкин бўлган ҳаракатларни содир этганлиги;

3. Буюртмачи томонидан танлов иштирокчиларига, **ташкилот омборида танловга қўйилган китоб маҳсулотлари етарли миқдорда мавжудлиги** ҳақида омборхона маълумотномасини тақдим этиш талаби қўйилган. Ушбу мезоннинг белгиланиши буюртмачи томонидан савдоларнинг битта ёки бир нечта иштирокчисига савдоларда қатнашиш учун имтиёзли шарт-шароитлар яратиб бериш аломати ҳисобланиши;

4. Буюртмачи томонидан танлов иштирокчиларига, **ташкилот ёпилиш ёки банкротлик ҳолатида эмаслиги** ҳақида маълумот тақдим этиш талаби қўйилган. Иштирокчи “Farg’ona kitob olami” МЧЖ ушбу талаб бўйича аниқ маълумот тақдим этилмаган бўлсада юқори 20 балл билан баҳоланган;

5. Буюртмачи томонидан танлов иштирокчиларига, **иштирокчи ташкилот таклиф бериш муддати тугашига камида 2 кун қолганида эълонда кўрсатилган китоб маҳсулотларидан 1 нусхадан** наъмуна тақдим этиши шартлиги талаби қўйилган. Электрон маълумотлар базасига бириктирилган ҳужжатлар ўрганилганда “Pharos ambition” МЧЖ ва “Kitob sayyorasi” МЧЖ наъмуна тақдим этганлиги тўғрисида **далолатномалар бириктирилмаганлиги**, ушбу талаб бўйича “Azboauz” МЧЖ томонидан 2023 йил 25 февралда BTS почтаси орқали юборилганлиги тўғрисида ва буни тасдиқловчи квитанция бириктирилганлиги ҳолатлари кузатилган.

Ўзбекистон Республикасининг “Давлат харидлари тўғрисида”ги Қонунининг **32-моддасида** давлат буюртмачиси томонидан белгиланадиган давлат хариди шартларида иштирокчиларнинг таклифларини **баҳолаш мезонлари, уларнинг нисбий қиймати, баҳолаш тартиб-таомиллари доирасида баҳолаш мезонларини қўллаш тартиби бўлиши кераклиги** белгиланган.

Мазкур Қонуннинг **46-моддасида** давлат харидлари жараёнида иштирокчиларни камситишга, бошқа иштирокчиларга зарар етказган ҳолда бир

иштирокчига имтиёзлар ёки преференциялар тақдим этишга, иштирокчиларнинг малакасига қўйилган талабларни оширишга, рақобатга йўл қўймасликнинг, уни чеклашнинг ёки бартараф этишнинг бошқа шаклларига, давлат харидлари ўтказилиши тўғрисидаги эълоннинг матнига иштирокчилар ўртасида рақобатни чеклайдиган Қонунга ҳилоф талабларни киритишга йўл қўйилмаслиги белгиланган.

Ўзбекистон Республикаси “Рақобат тўғрисида”ги Қонунининг **14-моддасида** савдолар ўтказишнинг қонун ҳужжатларида белгиланган тартибини бузиш, савдоларнинг битта ёки бир нечта иштирокчисига савдоларда қатнашиш учун имтиёзли шарт-шароитлар яратиб бериш танлов савдоларини ўтказишда рақобатни чеклашга олиб келадиган ёки олиб келиши мумкин бўлган ҳаракатлар сифатида таъкидланган.

Мазкур масала юзасидан йиғилиш давомида Комиссия аъзоларининг фикрлари тингланди.

Кун тартибидаги 5-масала юзасидан.

Комиссия томонидан “Epiroc mining and construction technique” МЧЖнинг мурожаати аввалги йиғилишда қўриб чиқилган бўлиб, мазкур мурожаат юзасидан Рақобатни ривожлантириш ва истемолчилар ҳуқуқларини химоя қилиш қўмитасининг хулосаси олингандан сўнг якуний қарор қабул қилишга Комиссия аъзолари билан келишилган.

Шунга мувофиқ Рақобатни ривожлантириш ва истемолчилар ҳуқуқларини химоя қилиш қўмитасининг 2023 йил 17 апрелдаги 1889/12-17-сон хати олинган.

Ушбу хатда:

Мазкур энг яхши таклифларни танлаш бўйича ўтказилган савдода 3 та иштирокчи “Iko machinery” ХК МЧЖ, “Gortehmash” МЧЖ КК ҳамда “Epiroc Mining and Construction Technique” ХК МЧЖлар иштирок этганлиги;

танлов ғолиби таклифларни баҳолаш мезонида “энг паст нарх усули” орқали аниқланиши белгиланганлиги;

танловнинг техник шартларида “Iko machinery” ХК МЧЖ ҳамда “Epiroc Mining and Construction Technique” ХК МЧЖ тўплаган баллари бир хил эканлиги ҳамда “Gortehmash” МЧЖ КК эълондаги шарт бўйича ўхшаш хизматлар етказиб бериш тажрибаси бўйича тақдим қилинган ҳужжатда бошқа хизмат кўрсатилганлиги сабабли танловдан четлатилганлиги.

танловнинг нарх қисмида “Iko machinery” ХК МЧЖ энг паст нарх таклифи билан ғолиб бўлганлиги, “Epiroc Mining and Construction Technique” ХК МЧЖ захира ғолиби бўлганлиги.

ушбу танлаш жараёнида рақобат қонунчилиги бузилиши аломатлари кузатилмаганлиги маълум қилинган.

Комиссия йиғилиши давомида мазкур масала юзасидан Комиссия аъзоларининг фикир ва мулоҳазалари тўлиқ тингланди.

Юқоридаги масалаларни кўриб чиқиб, Комиссия қарор қилади:

1. 1-масала юзасидан.

“Капитал Курилиш Дизайн Сервис” МЧЖнинг мурожаатида қайд этилган важлар ижрочини “инсофсиз ижрочилар ягона реестри”дан чиқариш учун асос бўлиб ҳисобланмаслиги сабабли аризани қаноатлантириш рад этилсин.

Мурожаатчига “Давлат харидлари тўғрисида”ги Қонуннинг 78-моддасига мувофиқ Давлат харидлари соҳасидаги шикоятларни кўриб чиқиш бўйича комиссиянинг қарори устидан суд тартибида шикоят қилиши ҳуқуқи тушунтирилсин.

2. 2-масала юзасидан.

Тошкент туманлараро маъмурий судининг 2023 йил 5 апрелдаги 5-1001-2307/766 сонли ҳал қилув қарори ижросини таъминлаш ҳамда қонунчилик талабларига мувофиқ “Imron nur stroy-XXI” (Андижон ихлос курилиш) МЧЖ Инсофсиз ижрочиларнинг ягона реестридан чиқарилсин.

3. 3-масала юзасидан.

“Kolorpak” МЧЖнинг мурожаати юзасидан таклиф этилган давлат буюртмачиси Комиссия йиғилишида иштирок этмаганлиги сабабли мазкур масала юзасидан тегишли қарор қабул қилиш учун Комиссиянинг навбатдаги йиғилишига қолдирилсин.

4. 4-масала юзасидан.

Тошкент вилояти болалар кутубхонаси томонидан 223519-лот рақами билан “китоб маҳсулотлари” сотиб олиш учун ўтказилган энг яхши таклифни танлаш савдолари юзасидан қабул қилинган давлат буюртмачисининг қарори **бекор қилинсин.**

Давлат буюртмачисига харид ҳужжатларига мувофиқ таклифларни баҳолаш талабларини бузиш амалдаги қонунчиликка кўра маъмурий жавобгарликни келтириб чиқариши тушунтирилсин.

Томонларга Комиссиянинг қарори устидан суд тартибида шикоят қилиши ҳуқуқи тушунтирилсин.

5. 5-масала юзасидан.

“Epiroc mining and costruction technique” МЧЖнинг мурожаатида келтирилган важлар ўз тасдиғини топмаганлиги, шунингдек танлашни бекор қилиш тўғрисида қарор қабул қилиш учун етарли асослар мавжуд бўлмаганлиги сабабли шикоятни қаноатлантириш рад этилсин.

Мурожаатчига давлат буюртмачисининг ҳаракатлари (ҳаракатсизлиги) устидан суд тартибида шикоят қилиш ҳуқуқи тушунтирилсин.